

四庫全書

史部

欽定四庫全書

左傳紀事本末卷二

詹事府詹事高士奇撰

桓王伐鄭

隱公三年鄭武公莊公為平王卿士王貳于虢鄭伯怨王王曰無之故周鄭交質王子狐為質于鄭鄭公子忽為質于周王崩周人將畀虢公政四月鄭祭足帥師取溫之麥秋又取成周之禾周鄭交惡君子曰信不由中

質無益也明恕而行要之以禮雖無有質誰能間之苟  
有明信澗谿沼沚之毛蘋蘩藟藻之菜筐筥錡釜之器  
潢汙行潦之水可薦于鬼神可羞于王公而况君子結  
二國之信行之以禮又焉用質風有采蘩采蘋雅有行  
葦泂酌昭忠信也 六年鄭伯如周始朝桓王也王不  
禮焉周桓公言于王曰我周之東遷晉鄭焉依善鄭以  
勸來者猶懼不諒况不禮焉鄭不來矣 八年夏虢公  
忌父始作卿士于周 八月丙戌鄭伯以齊人朝王禮

也十一年王取鄔劉爲邳之田于鄭而與鄭人蘇忿  
生之田溫原絺樊隰郕攢茅向盟州陘墮懷君子是以  
知桓王之失鄭也恕而行之德之則也禮之經也已弗  
能有而以與人人之不至不亦宜乎桓公五年王奪  
鄭伯政鄭伯不朝秋王以諸侯伐鄭鄭伯禦之王爲中  
軍虢公林父將右軍蔡人衛人屬焉周公黑肩將左軍  
陳人屬焉鄭子元請爲左拒以當蔡人衛人爲右拒以  
當陳人曰陳亂民莫有鬪心若先犯之必奔王卒顧之

必亂蔡衛不枝固將先奔既而萃于王卒可以集事從之曼伯為右拒祭仲足為左拒原繁高渠彌以中軍奉公為魚麗之陳先偏後伍伍承彌縫戰于繻葛命二拒曰旂動而鼓蔡衛陳皆奔王卒亂鄭師合以攻之王卒大敗祝聃射王中肩王亦能軍祝聃請從之公曰君子不欲多上人况敢陵天子乎苟自救也社稷無隕多矣夜鄭伯使祭足勞王且問左右七年夏盟向求成于鄭既而背之秋鄭人齊人衛人伐盟向王遷盟向之民

于郊

臣士奇曰鄭桓公死驪山之亂其子武公及武公之子莊公相繼為王朝卿士國于虢鄆之間無遠天室周之東遷固嘗依之其地親而功大誠難遽泯平王暱于虢公欲授之政周人不能裁以大義卒踐其言此交惡之所由始也夫臣子之于君父信而見疑忠而被疎則益負罪引慝積其忠誠以冀一旦之悔悟而已乃上下相要愛子出質君臣

之分等于敵國左氏直稱周鄭蓋深疾鄭伯之不  
臣也及虢公栢用祭仲悍然稱麥禾之戈目中尚  
有天子耶春秋世諸侯放恣而用兵王室者自鄭  
莊始滅理犯分甘舉父祖之勤勞而盡棄之悖已  
甚矣桓王繼立銜麥禾之怨來朝不答固失不念  
舊惡之義與善鄭以勸來者之權取鄆劉為邦之  
田而償以所必不得桓王所以處鄭者誠不能無  
過乃鄭遂鞅鞅廢述職之禮曾不思要言質子取

麥取禾敢施之天子不顧其難堪王禮少不愜意  
而以無禮報之臣誼之謂何至天子總帥六師問  
罪境上不歸死司寇頓首伏辜遽興師而與之抗  
逞子元之狡謀縱祝聃之狂矢向使王不能軍此  
際寧有天日耶至請從而不許托不敢陵天子之  
名夜使祭足勞王且問左右飾殷勤曲謹之節而  
其玩弄王室如股掌情罪益彰矣當日者以天子  
之兵加以四國雲附之旅豈不能覆一鄭乃徒敗



軍奔王威幾頓蓋號為王所暱其奔也力不贍也  
非有貳心于鄭也若陳蔡衛則實無鬪志望旗而  
靡疑有同類之懼焉唐世諸藩鎮合兵討賊往往  
徘徊觀望不欲盡力意亦如此故繻葛之敗蔡衛  
陳亦不為無罪也胡文定嘉其從王未之察耳

左傳紀事本末卷二

欽定四庫全書

左傳紀事本末卷三

詹事府詹事高士奇撰

王臣之事

王朝交列國 定靈婚  
齊附 諸侯朝王併附

隱公七年初戎朝於周發幣於公卿凡伯弗賓冬王使  
凡伯來聘還戎伐之於楚丘以歸 莊公二十九年樊  
皮叛王 三十年春王命虢公討樊皮夏四月丙辰虢  
公入樊執樊仲皮歸於京師 僖公十年春狄滅溫蘇

子無信也蘇子叛王即狄又不能於狄狄人伐之王不救故滅蘇子奔衛 文公三年夏四月乙亥王叔文公卒來赴弔如同盟禮也

辨誤

穀梁傳曰叔服也按王子虎與叔服自是二人穀梁誤

十四年春頃王崩周公閱與王孫蘇爭政故不赴凡崩薨不赴則不書禍福不告亦不書懲不敬也 周公將與王孫蘇訟于晉王叛王孫蘇而使尹氏與聃啟訟周

公子晉趙宣子平王室而復之 十七年秋周甘歃敗  
戎于郊垂乘其飲酒也 宣公六年夏定王使子服求  
后于齊冬召桓公逆王后于齊 十五年王孫蘇與召  
氏毛氏爭政使王子捷殺召戴公及毛伯衛卒立召襄  
十六年夏成周宣榭火人火之也凡火人火曰火天  
火曰災 為毛召之難故王室復亂王孫蘇奔晉晉人  
復之 冬晉侯使士會平王室定王享之原襄公相禮  
殺烝武子私問其故王聞之召武子曰季氏而弗聞乎

王享有體薦宴有折俎公當享卿當宴王室之禮也武子歸而講求典禮以修晉國之法

補逸國語晉侯使隨會聘于周定王享之穀烝原公相

禮范子私于原公曰吾聞王室之禮無毀折今此何禮也王見其語也召原公而問之原公以告王召士季曰子弗聞乎郊禘之事則有全烝王公立飫則有房烝親戚宴饗則有穀烝今女非它也而叔父使士季實來修舊德以獎王室唯是先王之宴禮欲以貽

女余一人敢設飫禘焉忠非親禮而干舊職以亂前  
好且唯夫戎翟則有體薦夫戎翟冒沒輕儻貪而不  
讓其血氣不治若禽獸焉其適來班貢不俟馨香嘉  
味故坐諸門外而使舌人體委與之女今我王室之  
一二兄弟以時相見將和協典禮以示民訓則無亦  
擇其柔嘉選其馨香潔其酒醴品其百遵修其簋簠  
奉其犧象出其尊彝陳其鼎豆靜其巾帨敬其祓  
除體解節折而共飲食之於是乎有折俎加豆酬幣宴

貨以示容合好胡有子然其效戎翟也夫王公諸侯  
之有飫也將以講事成章建大德昭大物也故立成  
禮烝而已飫以顯物宴以食好歲飫不倦時宴不淫  
月會旬修日完不忘服物昭庸采飾顯明文章比象  
周旋序順容貌有崇威儀有則五味實氣五色精心  
五聲昭德五義紀宜飲食可享和同可觀財用可嘉  
則順而建德古之善禮者將焉用全烝武子遂不敢  
對而退歸乃講聚三代之典禮於是乎修執秩以為晉

法

成公元年春晉侯使瑕嘉平戎于王單襄公如晉拜成  
劉康公徼戎將遂伐之叔服曰背盟而欺大國此必敗  
背盟不祥欺大國不義神人弗助將何以勝不聽遂伐  
茅戎三月癸未敗績于徐吾氏 秋王人來告敗 十  
一年周公楚惡惠襄之偏也且與伯輿爭政不勝怒而  
出及陽樊王使劉子復之盟于鄆而入三日復出奔晉  
十二年春王使以周公之難來告書曰周公出奔晉



凡自周無出周公自出故也 十三年春三月公如京  
師宣伯欲賜請先使王以行人之禮禮焉孟獻子從王  
以為介而重賄之公及諸侯朝王遂從劉康公成肅公  
會晉侯伐秦成子受脤于社不敬劉子曰吾聞之民受  
天地之中以生所謂命也是以有動作禮義威儀之則  
以定命也能者養之以福不能者敗以取禍是故君子  
勤禮小人盡力勤禮莫如致敬盡力莫如敦篤敦在養  
神篤在守業國之大事在祀與戎祀有執膳戎有受脤

神之大節也今成子情棄其命矣其不反乎 夏成肅  
公卒于瑕 襄公五年王使王叔陳生愬戎于晉晉人  
執之士魴如京師言王叔之貳于戎也 十年王叔陳  
生與伯輿爭政王右伯輿王叔陳生怒而出奔及河王  
復之殺史狡以說焉不入遂處之晉侯使士匄平王室  
王叔與伯輿訟焉王叔之宰與伯輿之大夫瑕禽坐獄  
于王庭士匄聽之王叔之宰曰簞門閨竇之人而皆陵  
其上其難為上矣瑕禽曰昔平王東遷吾七姓從王牲

用備具王賴之而賜之駢旄之盟曰世世無失職若簞  
門閨竇其能來東底乎且王何賴焉今自王叔之相也  
政以賄成而刑放于寵官之師旅不勝其富吾能無簞  
門閨竇乎唯大國圖之下而無直則何謂正矣范宣子  
曰天子所右寡君亦右之所左亦左之使王叔氏與伯  
輿合要王叔氏不能舉其契王叔奔晉不書不告也單  
靖公為卿士以相王室十二年靈王求后于齊齊侯  
問對于晏桓子桓子對曰先王之禮辭有之天子求后于

諸侯諸侯對曰夫婦所生若而人妾婦之子若而人無女而有姊妹及姑姊妹則曰先守某公之遺女若而人齊侯許昏王使陰里結之十四年王使劉定公賜齊侯命曰昔伯舅大公右我先王股肱周室師保萬民世胙大師以表東海王室之不壞繫伯舅是賴今余命女環茲率舅氏之典纂乃祖考無忝乃舊敬之哉無廢朕命十五年官師從單靖公逆王后于齊卿不行非禮也三十年初王儋季卒其子括將見王而歎單公子

愆期為靈王御士過諸廷聞其歎而言曰烏乎必有此  
夫人以告王且曰必殺之不感而願大視躁而足高心  
在他矣不殺必害王曰童子何知及靈王崩儋括欲立  
王子佞夫佞夫弗知戊子儋括圍蔦遂成愆成愆奔平  
時五月癸巳尹言多劉穀單蔑甘過鞏成殺佞夫括瑕  
廖奔晉書曰天王殺其弟佞夫罪在王也 昭公七年  
單獻公棄親用羈冬十月辛酉襄頃之族殺獻公而立  
成公 九年周甘人與晉閭嘉爭閭田晉梁丙張趯率

陰戎伐潁王使詹桓伯辭于晉曰我自夏以后稷魏駘  
芮岐畢吾西土也及武王克商蒲姑商奄吾東土也巴  
濮楚鄧吾南土也肅慎燕亳吾北土也吾何邇封之有  
文武成康之建母弟以蕃屏周亦其廢隊是為豈如弁  
髦而因以敝之先王居禱杙于四裔以禦魍魎故允姓  
之姦居于瓜州伯父惠公歸自秦而誘以來使偪我諸  
姬入我郊甸則戎焉取之戎有中國誰之咎也后稷封  
殖天下今戎制之不亦難乎伯父圖之我在伯父猶衣

服之有冠冕木水之有本原民人之有謀主也伯父若  
裂冠毀冕拔本塞原專棄謀主雖戎狄其何有余一人  
叔向謂宣子曰文之伯也豈能改物翼戴天子而加之  
以共自文以來世有衰德而暴滅宗周以宣示其侈諸  
侯之貳不亦宜乎且王辭直子其圖之宣子說王有姻  
喪使趙成如周弔且致閭田與禭反潁俘王亦使賓滑  
執甘大夫襄以說于晉晉人禮而歸之 十一年單子  
會韓宣子于戚視下言徐叔向曰單子其將死乎朝有

著定會有表衣有襜帶有結會朝之言必聞于表著之位所以昭事序也視不過結襜之中所以道容貌也言以命之容貌以明之失則有闕今單子為王官伯而命事于會視不登帶言不過步貌不道容而言不昭矣不道不共不昭不從無守氣矣 十二月單成公卒 十二年周原伯絞虐其興臣使曹逃冬十月壬申朔原興人逐絞而立公子䟽尋絞奔郊甘簡公無子立其弟過過將去成景之族成景之族賂劉獻公丙申殺甘悼公



而立成公之孫鮒丁酉殺獻太子之傅庾皮之子過殺  
瑕辛于市及宮嬖綽王孫沒劉州鳩陰忌老陽子十  
八年春王二月乙卯周毛得殺毛伯過而代之長弘曰  
毛得必亡是昆吾稔之日也侈故之以而毛得以濟侈  
于王都不亡何待 定公元年周鞏簡公棄其子弟而  
好遠人 二年夏四月辛酉鞏氏之羣子弟賊簡公

臣士奇曰人臣之于國家無委脫之事而亦無偏  
據之權虛公以奉國和衷以取濟則庶績咸熙而

天下享無事之福周之興也周召同心而治其再  
振也共和相倚而亦治其東也鄭虢爭政而王室  
遂微自是以後覆轍相尋未有不由于大臣之水  
火而國勢亦隨之者也夫權者天下之大柄也偏  
據則必爭爭則交傷而兩敗凶于而家害于而國  
歷有顯徵就使其未至于甚害而以有用之精神  
不為國家建功樹策徒擲之蜩蟬門戶中甚可惜  
也樊皮蘇子之叛逆自取滅亡無論矣頃王方經

大故而周公閱與王孫蘇者乃以爭政不行告赴之禮知有勢利而不知有大義周室幾何而不陵夷耶王黨周公而叛王孫蘇至使尹聃訟周公于晉趙簡子平王室而復之進退不能自操而仰重于霸國王靈替矣其後王孫蘇又與召氏毛氏爭政而殺召公毛伯王室復亂士會平之周公又與伯輿爭政怒而出王使盟之卒奔晉而不復也迨王叔陳生又與伯輿爭政王心直伯輿而不能斷

至煩霸國之老坐獄于王庭而後定之則當時王  
臣之營私植黨莫有奉公憂國者其為衰削之由  
于此可見而王之贅疣亦可知矣王叔陳生之貳  
心于狄也不獨與伯與忿爭為可罪也僭括之欲  
立王子佞夫佞夫不知而劉單諸人輒殺之是失  
刑也原伯綏以虐被逐甘過以欲去成景之族反  
為所害而原甘之族微也毛得殺毛伯過而代之  
其汰已甚也鞏簡公之棄子弟而用遠人與單獻

公之棄親用羈其失一也而一死子弟之手一死  
襄頃之族何其無所忌也成子之受脤不敬與單  
子之視下言徐皆衰氣也劉康公知民之所由生  
詹桓伯伸爭田之辨愆期察詹括之歎萇弘識毛  
得之亡蓋亦王臣之矯矯者而究無裨于禍敗豈  
所謂大厦非一木之支者耶若夫凡伯之見辱于  
楚丘王師之敗北于徐吾雖有邛垂之勝未足為  
榮晉先平戎于王而以閭田之故又率陰戎以伐

賴不義甚矣吁平桓以下王室蠢蠢威福下移相  
傾相軋勢若亂絲而不可理也是誰之過歟

左傳紀事本末卷三

欽定四庫全書

左傳紀事本末卷四

詹事府詹事高士奇撰

王室庶孽之禍

桓公十八年秋周公欲弑莊王而立王子克辛伯告王  
遂與王殺周公黑肩王子克奔燕初子儀有寵於桓王  
桓王屬諸周公辛伯諫曰並后匹嫡兩政耦國亂之本  
也周公弗從故及

以上子克之亂

莊公十六年初晉武公伐



夷執夷詭諸為國請而免之既而弗報故子國作亂謂  
晉人曰與我伐夷而取其地遂以晉師伐夷殺夷詭諸  
周公忌父出奔虢惠王既立而後復之 十九年初王

姚嬖于莊王生子頹子頹有寵為國為之師及惠王即  
位取為國之圃以為圃邊伯之宮近於王宮王取之王  
奪子禽祝跪與詹父田而收膳夫之秩故為國邊伯石  
速詹父子禽祝跪作亂因蘇氏 秋五大夫奉子頹以  
伐王不克出奔溫蘇子奉子頹以奔衛衛師燕師伐周

冬立子頹 二十年春鄭伯和王室不克執燕仲父夏  
鄭伯遂以王歸王處于櫟秋王及鄭伯入于鄆遂入成  
周取其寶器而還冬王子頹享五大夫樂及徧舞鄭伯  
聞之見虢叔曰寡人聞之哀樂失時殃咎必至今王子  
頹歌舞不倦樂禍也夫司寇行戮君為之不舉而况敢  
樂禍乎奸王之位禍孰大焉臨禍忘憂憂必及之盍納  
王乎虢公曰寡人之願也 二十一年春胥命于弭夏  
同伐王城鄭伯將王自圉門入虢叔自北門入殺王子

頽及五大夫鄭伯享王于闕西辟樂備王與之武公之  
畧自虎牢以東原伯曰鄭伯效尤其亦將有咎五月鄭  
厲公卒 王巡虢守虢公為王宮于珽王與之酒泉鄭  
伯之享王也王以后之鞶鑑予之虢公請器王予之爵  
鄭伯由是始惡於王冬王歸自虢 二十七年十月王  
使召伯廖賜齊侯命且請伐衛以其立子頽也 二十  
八年春齊侯伐衛戰敗衛師數之以王命取賂而還  
僖公十年春狄滅溫蘇子無信也蘇子叛王即狄又不

能於狄狄人伐之王不救故滅蘇子奔衛

以上子  
頽之亂

莊

公十八年號公晉侯鄭伯使原莊公逆王后于陳陳媯

歸于京師實惠后

僖公七年閏月惠王崩襄王惡大

叔帶之難懼不立不發喪而告難于齊 八年春盟于

洮謀王室也

襄王定位而后發喪

冬王人來告喪

難故也是以緩

十一年夏楊拒泉臯伊維之戎同伐

京師入王城焚東門王子帶召之也秦晉伐戎以救周

秋晉侯平戎于王

十二年王以戎難故討王子帶秋

王子帶奔齊 冬齊侯使管夷吾平戎于王使隰朋平戎于晉王以上卿之禮饗管仲管仲辭曰臣賤有司也有天子之二守國高在若節春秋來承王命何以禮焉陪臣敢辭王曰舅氏余嘉乃勲應乃懿德謂督不忘往踐乃職無逆朕命管仲受下卿之禮而還君子曰管氏之世祀也宜哉讓不忘其上詩曰愷悌君子神所勞矣十三年春齊侯使仲孫湫聘于周且言王子帶事畢不與王言歸復命曰未可王怒未怠其十年乎不十年

王弗召也 秋為戎難故諸侯戍周齊仲孫湫致之

十六年王以戎難告于齊齊徵諸侯而戍周 二十年

滑人叛鄭而服於衛夏鄭公子士洩堵寇帥師入滑

二十二年富辰言於王曰請召大叔詩曰協比其鄰昏

姻孔云吾兄弟之不協焉能怨諸侯之不睦王說王子

帶自齊復歸于京師王召之也 二十四年鄭之入滑

也滑人聽命師還又即衛鄭公子士洩堵俞彌帥師伐

滑王使伯服游孫伯如鄭請滑鄭伯怨惠王之入而不

與厲公爵也又怨襄王之與衛滑也故不聽王命而執  
二子王怒將以狄伐鄭富辰諫曰不可臣聞之大上以  
德撫民其次親親以相及也昔周公弔二叔之不咸故  
封建親戚以蕃屏周管蔡邴霍魯衛毛聃郕雍曹滕畢  
原鄆郇文之昭也邠晉應韓武之穆也凡蔣邢茅胙祭  
周公之胤也召穆公思周德之不類故糾合宗族于成  
周而作詩曰常棣之華鄂不韡韡凡今之人莫如兄弟  
其四章曰兄弟鬩于牆外禦其侮如是則兄弟雖有小

忿不廢懿親今天子不忍小忿以棄鄭親其若之何庸  
勲親親暱近尊賢德之大者也即聾從昧與頑用嚚姦  
之大者也棄德崇姦禍之大者也鄭有平惠之勲又有  
厲宣之親棄嬖寵而用三良於諸姬為近四德具矣耳  
不聽五聲之和為聾目不別五色之章為昧心不則德  
義之經為頑口不道忠信之言為嚚狄皆則之四姦具  
矣周之有懿德也猶曰莫如兄弟故封建之其懷柔天  
下也猶懼有外侮扞禦侮者莫如親親故以親屏周召



穆公亦云今周德既衰於是乎又渝周召以從諸姦無  
乃不可乎民未忘禍王又興之其若文武何王弗聽使  
頹叔桃子出狄師夏狄伐鄭取櫟王德狄人將以其  
女為后富辰諫曰不可臣聞之曰報者倦矣施者未厭  
狄固貪恠王又啟之女德無極婦怨無終狄必為患王  
又弗聽初甘昭公有寵於惠后惠后將立之未及而卒  
昭公奔齊王復之又通於隗氏王替隗氏頹叔桃子曰  
我實使狄狄其怨我遂奉大叔以狄師攻王王御士將

禦之王曰先后其謂我何寧使諸侯圖之王遂出及坎  
欲國人納之秋頹叔桃子奉大叔以狄師伐周大敗周  
師獲周公忌父原伯毛伯富辰王出適鄭處於汜大叔  
以隗氏居於溫

補逸國語王黜翟后翟人來誅殺譚伯富辰曰昔吾驟

諫王王弗從以及此難若我不出王其以我為懟乎  
乃以其屬死之初惠后欲立王子帶故以其黨啟翟  
人翟人遂入周王乃出居於鄭晉文公納之

冬王使來告難曰不穀不德得罪于母弟之寵子帶鄙  
在鄭地汜敢告叔父臧文仲對曰天子蒙塵于外敢不  
奔問官守王使簡師父告于晉使左馭父告于秦天子  
無出書曰天王出居于鄭辟母弟之難也天子凶服降  
名禮也鄭伯與孔將鉏石甲父侯宣多省視官具于汜  
而後聽其私政禮也 二十五年秦伯師于河上將納  
王狐偃言於晉侯曰求諸侯莫如勤王 晉侯辭秦師  
而下三月甲辰次于陽樊右師圍溫左師逆王 夏四

月丁巳王入于王城取大叔于溫殺之于隰城戊午晉侯朝王王饗醴命之宥請隧弗許曰王章也未有代德而有二王亦叔父之所惡也與之陽樊溫原攢茅之田

晉於是始啟南陽

以上子帶之亂

補逸

國語靈王二十二年穀洛鬪將毀王宮王欲壅之大

子晉諫曰不可晉聞古之長民者不墮山不崇藪不防川不竇澤夫山土之聚也藪物之歸也川氣之導也澤水之鍾也夫天地成而聚於高歸物於下疏為

川谷以導其氣陂唐污庳以鍾其美是故聚不阨崩  
而物有所歸氣不沈滯而亦不散越是以民生有財  
用而死有所葬然則無天昏札瘥之憂而無饑寒乏  
匱之患故上下能相固以待不虞古之聖王唯此之  
慎昔共工棄此道也虞於湛樂淫失其身欲壅防百  
川墮高堙庳以害天下皇天弗福庶民弗助禍亂並  
興共工用滅其在有虞有宓伯鯀播其淫心稱遂共  
工之過堯用殛之於羽山其後伯禹念前之非度釐

改制量象物天地比類百則儀之於民而度之於羣  
生共之從孫四岳佐之高高下下疏川導滯鍾水豐  
物封崇九山決汨九川陂障九澤豐殖九數汨越九  
原宅居九隠合通四海故天無伏陰地無散陽水無  
沈氣火無災燁神無閒行民無淫心時無逆數物無  
害生帥象禹之功度之於軌儀莫非嘉績克厭帝心  
皇天嘉之胙以天下賜姓曰姒氏曰有夏謂其能以  
嘉祉殷富生物也胙四岳國命為侯伯賜姓曰姜氏

曰有呂謂其能為禹股肱心膂以養物豐民人也此  
一王四伯豈繫多寵皆亡王之後唯能釐舉嘉義以  
有脩在下守祀不替其典有夏雖衰祀鄩猶在申呂  
雖衰齊許猶在唯有嘉功以命姓受祀迄於天下及  
其失之也必有愆淫之心間之故亡其氏姓踣弊不  
振絕後無主堙替隸圉夫亡者豈繫無寵皆黃炎之  
後也唯不帥天地之度不順四時之序不度民神之  
義不儀生物之則以殄滅無脩至于今不祀及其得

之也必有忠信之心間之度於天地而順於時動和  
於民神而儀於物則故高朗令終顯融昭明命姓受  
氏而附之以命名若啟先王之遺訓省其典圖刑法  
而觀其廢興者皆可知也其興者必有夏呂之功焉  
其廢者必有共鯀之敗焉今吾執政無乃實有所避  
而滑夫二川之神使至于爭明以妨王宮王而飾之  
無乃不可乎人有言曰無過亂人之門又曰佐難者  
嘗焉佐鬪者傷焉又曰禍不好不能為禍詩曰四牡



駸駸旌旄有翩亂生不夷靡國不泯又曰民之貪亂  
寧為荼毒夫見亂而不惕所殘必多其飾彌章民有  
怨亂猶不可遏而況神乎王將防鬪川以飾宮是飾  
亂而佐鬪也其無乃章禍且遇傷乎自我先王厲宣  
幽平而貪天禍至於今未弭我又章之懼長及子孫  
王室其愈卑乎其若之何自后稷以來寧亂及文武  
成康而僅克安民自后稷之始基靖民十五王而文  
始平之十八王而康克安之其難也如是厲始革典

十四王矣基德十五而始平基禍十五其不濟乎吾  
朝夕倣懼曰其何德之修而少光王室以逆天休王  
又章輔禍亂將何以堪之王無亦鑒於黎苗之王下  
及夏商之季上不象天而下不儀地中不和民而方  
不順時不共神祇而蔑棄五則是以人夷其宗廟而  
火焚其彝器子孫為隸下夷於民而亦未觀夫前哲  
令德之則則此五者而受天之豐福饗民之勲力子  
孫豐厚令聞不忘是皆天子之所知也天所崇之子

孫或在畎畝由欲亂民也畎畝之人或在社稷由欲靖民也無有異焉詩云殷鑒不遠近在夏后之世將焉用飾宮以徼亂也度之天神則非祥也比之地物則非義也類之民則則非仁也方之時動則非順也咨之前訓則非正也觀之詩書與民之憲言皆亡王之為也上下儀之無所比度王其圖之夫事大不從象小不從文上非天刑下非地德中非民則方非時動而作之者必不節矣作又不節害之道也王卒墜

之及景王多寵人亂於是乎始生景王崩王室大亂  
及定王王室遂卑

周書晉侯尚力侵我王畧叔向聞諸幼而果賢復王  
位作太子晉晉平公使叔譽于周見太子晉而與之  
言五稱而五窮遂巡而退其不遂歸告公曰太子晉  
行年十五而臣弗能與言君請歸聲就復與田若不  
反及有天下將以為誅平公將歸之師曠不可曰請  
使瞽臣往與之言若能蒙子反而復之師曠見太子

稱曰吾聞王子之語高於泰山夜寢不寐晝居不安  
不遠長道而求一言王子應之曰吾聞太師將來甚  
喜而又懼吾年甚少見子而懾盡忘吾其度師曠曰  
吾聞王子古之君子甚成不驕自晉始如周行不知  
勞王子應之曰古之君子其行至慎天下施闕道路  
無限百姓說之相將而遠遠人來驩視道如尺師曠  
告善又稱曰古之君子其行可則由舜而下其孰有  
廣德王子應之曰如舜者天舜居其所以利天下奉

翼遠人皆得已仁此之謂天如禹者聖勞而不居以  
利天下好取不好與必度其正是之謂聖如文王者  
其大道仁其小道惠三分天下而有其二敬人無方  
服事於商既有其衆而返失其身此之謂仁如武王  
者義殺一人而以利天下異姓同姓各得之謂義師  
曠告善又稱曰宣辨名命異姓惡方王侯君公何以  
為尊何以為上王子應之曰人生而重丈夫謂之冑  
子冑子成人能治上官謂之士士率衆時作謂之曰

伯伯能移善於衆與百姓同謂之公公能樹名與物  
天道俱謂之侯侯能成羣謂之君君有廣德分任諸  
侯而敦信曰予一人善至于四海曰天子達於四荒  
曰天王四荒至莫有怨訾乃登為帝師曠罄然又稱  
曰溫恭敦敏方德不改聞物下學以起尚登帝臣乃  
參天子自古誰王子應之曰穆穆虞舜明明赫赫立  
義治律萬物皆作分均天財萬物熙熙非舜而誰能  
師曠東躅其足曰善哉善哉王子曰太師何舉足驟

師曠曰天寒足躅是以數也王子曰請入坐遂數席  
注瑟師曠歌無射曰國誠寧矣遠人來觀修義經矣  
好樂無荒乃注瑟於王子王子歌嶠曰何自南極至  
於北極絕境越國弗愁道遠師曠蹶然起曰瞑臣請  
歸王子賜之乘車駟馬曰太師亦善御之師曠對曰  
御吾未之學也王子曰汝不為夫時詩云馬之剛矣  
轡之柔矣馬亦不剛轡亦不柔志氣塵塵取予不疑  
以是御之師曠對曰瞑臣無見為人辯也唯耳之恃



而耳又寡聞而易窮王子汝將為天下宗乎王子曰  
太師何汝賤我乎自太皞以下至於堯舜禹未有一  
姓而再有天下者夫大當時而不伐天何可得且吾  
聞汝知人年長短告我師曠對曰汝聲清汗汝色赤  
白火色不壽王子曰吾後三年上賓於天所汝慎無  
言禍將及汝師曠歸未及三年告死者至

發明王子晉靈王長子景王之兄也生有神聖之姿使  
得嗣位則文武復生宣王不足數矣無如周不再興

哲嗣早世景王以後庶孽之禍益甚豈非天與故輯  
其遺言軼事于子朝之亂之前詩云人之云亡邦國  
殄瘁信哉

昭公十五年夏六月乙丑王太子壽卒 秋八月戊寅  
王穆后崩 十二月晉荀躒如周葬穆后籍談為介既  
葬除喪以文伯宴樽以魯壺王曰伯氏諸侯皆有以鎮  
撫王室晉獨無有何也文伯揖籍談對曰諸侯之封也  
皆受明器於王室以鎮撫其社稷故能薦彝器於王晉

居深山戎狄之與鄰而遠於王室王靈不及拜戎不暇  
其何以獻器王曰叔氏而忘諸乎叔父唐叔成王之母  
弟也其反無分乎密須之鼓與其大路文所以大蒐也  
闕鞏之甲武所以克商也唐叔受之以處參虛匡有戎  
狄其後襄之二路鉞鉞鉅鬯彤弓虎賁文公受之以有  
南陽之田撫征東夏非分而何夫有勲而不廢有績而  
載奉之以土田撫之以彝器旌之以車服明之以文章  
子孫不忘所謂福也福祚之不登叔父焉在且昔而高

祖孫伯賡司晉之典籍以為大政故曰籍氏及辛有之二子董之晉於是乎有董史女司典之後也何故忘之籍談不能對賓出王曰籍父其無後乎數典而忘其祖籍談歸以告叔向叔向曰王其不終乎吾聞之所樂必卒焉今王樂憂若卒以憂不可謂終王一歲而有三年之喪二焉於是乎以喪賓宴又求彝器樂憂甚矣且非禮也彝器之來嘉功之由非由喪也三年之喪雖貴遂服禮也王雖弗遂宴樂以早亦非禮也禮王之大經也

一動而失二禮無大經矣言以考典典以志經忘經而多言舉典將焉用之 十八年秋葬曹平公往者見周

原伯魯焉與之語不說學歸以語閔子馬閔子馬曰周其亂乎夫必多有是說而後及其大人大人患失而惑又曰可以無學無學不害不害而不學則苟而可於是乎下陵上替能無亂乎夫學殖也不殖將落原氏其亡乎二十一年春天王將鑄無射冷州鳩曰王其以心疾死乎夫樂天子之職也夫音樂之興也而鐘音之器也

天子省風以作樂器以鐘之興以行之小者不窕大者  
不樛則和於物物和則嘉成故和聲入於耳而藏於心  
心億則樂窕則不咸樛則不容心是以感感實生疾今  
鐘樛矣王心弗堪其能久乎

補逸國語二十三年王將鑄無射而為之大林單穆公

曰不可作重幣以絕民資又鑄大鐘以鮮其繼若積  
聚既喪又鮮其繼生何以殖且夫鐘不過以動聲若  
無射有林耳不及也夫鐘聲以為耳也耳所不及非

鐘聲也猶目所不見不可以為目也夫目之察度也  
不過步武尺寸之間其察色也不過墨丈尋常之間  
耳之察和也在清濁之間其察清濁也不過一人之  
所勝是故先王之制鐘也大不出鈞重不過石律度  
量衡於是乎生小大器用於是乎出故聖人慎之今  
王作鐘也聽之弗及比之不度鐘聲不可以知和制  
度不可以出節無益於樂而鮮民財將焉用之夫樂  
不過以聽耳而美不過以觀目若聽樂而震觀美而

眩患莫甚焉夫耳目心之樞機也故必聽和而視正  
聽和則聰視正則明聰則言聽明則德昭聽言昭德  
則能思慮純固以言德於民民歆而德之則歸心焉  
上得民心以殖義方是以作無不濟求無不獲然則  
能樂夫耳內和聲而口出美言以為憲令而布諸民  
正之以度量民以心力從之不倦成事不貳樂之至  
也口內味而耳內聲聲味生氣氣在口為言在目為  
明言以信名明以時動名以成政動以殖生政成生



殖樂之至也若視聽不和而有震眩則味入不精不  
精則氣佚氣佚則不和於是乎有狂悖之言有眩惑  
之明有轉易之名有過慝之度出令不信刑政放紛  
動不順時民無據依不知所力各有離心上失其民  
作則不濟求則不獲其何以能樂三年之中而有離  
民之器二焉國其危哉王弗聽問之伶州鳩對曰臣  
之守官弗及也臣聞之琴瑟尚宮鐘尚羽石尚角匏  
竹利制大不踰宮細不過羽夫宮音之主也第以及

羽聖人保樂而愛財財以備器樂以殖財故樂器重者從細輕者從大是以金尚羽石尚角瓦絲尚宮匏竹尚議革木一聲夫政象樂樂從和和從平聲以和樂律以平聲金石以動之絲竹以行之詩以道之歌以詠之匏以宣之瓦以贊之革木以節之物得其常曰樂極極之所集曰聲聲應相保曰和細大不踰曰平如是而鑄之金磨之石繫之絲木越之匏竹節之鼓而行之以遂八風於是乎氣無滯陰亦無散陽陰

陽序次風雨時至嘉生繁祉人民和利物備而樂成  
上下不罷故曰樂正今細過其主妨於正用物過度  
妨於財正害財匱妨於樂細抑大陵不容於耳非  
和也聽聲越遠非平也妨正匱財聲不和平非宗官  
之所司也夫有和平之聲則有蕃殖之財於是乎道  
之以中德詠之以中音德音不愆以合神人神是以  
寧民是以聽若夫匱財用罷民力以逞淫心聽之不  
和比之不度無益於教而離民怨神非臣之所聞也

王不聽卒鑄大鐘二十四年鐘成伶人告和王謂伶  
州鳩曰鐘果和矣對曰未可知也王曰何故對曰上  
作器民備樂之則為和今財亡民罷莫不怨恨臣不  
知其和也且民所曹好鮮其不濟也其所曹惡鮮其  
不廢也故諺曰衆心成城衆口鑠金今三年之中而  
害金再興焉懼一之廢也王曰爾老耄矣何知二  
十五年王崩鐘不和

王將鑄無射問律於伶州鳩對曰律所以立均出度

也古之神瞽考中聲而量之以制度律均鐘百官軌儀紀之以三平之以六成於十二天之道也夫六中之色也故名之曰黃鍾所以宣養六氣九德也由是第之二曰大簇所以金奏贊陽出滯也三曰姑洗所以修潔百物考神納賓也四曰蕤賓所以安靖神人獻酬交酢也五曰夷則所以詠歌九則平民無貳也六曰無射所以宣布哲人之令德示民軌儀也為之六間以揚沈伏而黜散越也元間大呂助宣物也二

間夾鍾出四隙之細也三間中呂宣中氣也四間林  
鍾和轉百事俾莫不任肅純恪也五間南呂贊陽秀  
也六間應鍾均利器用俾應復也律呂不易無姦物  
也細鈞有鐘無鐃昭其大也大鈞有鐃無鐘甚大無  
鐃鳴其細也大昭小鳴和之道也和平則久久固則  
純純明則終終復則樂所以成政也故先王貴之王  
曰七律者何對曰昔武王伐殷歲在鶉火月在天駟  
日在析木之津辰在斗柄星在天龍星與日辰之位



皆在北維顓頊之所建也帝嚳受之我姬氏出自天  
龜及析木者有建星及牽牛焉則我皇妣大姜之姪  
伯陵之後逢公之所馮神也歲之所在則我有周之  
分野也月之所在辰馬農祥也我太祖后稷之所經  
緯也王欲合是五位三所而用之自鶉及駟七列也  
南北之揆七同也凡神人以數合之以聲昭之數合  
聲和然後可同也故以七同其數而以律和其聲於  
是乎有七律王以二月癸亥夜陳未畢而雨以夷則

之上宮畢之當辰辰在戌上故長夷則之上宮名之  
曰羽所以藩屏民則也王以黃鍾之下宮布戎于牧  
之野故謂之厲所以厲六師也太簇之下宮布令  
于商昭顯文德底紂之多臯故謂之宣所以宣三王  
之德也反及羸內以無射之上宮布憲施舍於百姓  
故謂之羸亂所以優柔容民也

二十二年王子朝賓起有寵於景王王與賓孟說之欲  
立之劉獻公之庶子伯蚩事單穆公惡賓孟之為人也



願殺之又惡王子朝之言以為亂願去之賓孟適郊見  
雄雞自斷其尾問之侍者曰自憚其犧也遽歸告王且  
曰雞其憚為人用乎人異於是犧者實用人人犧實難  
已犧何害王弗應夏四月王田北山使公卿皆從將殺  
單子劉子王有心疾乙丑崩于榮錡氏戊辰劉子摯卒  
無子單子立劉蚩五月庚辰見王遂攻賓起殺之盟羣  
王子于單氏 丁巳葬景王王子朝因舊官百工之喪  
職秩者與靈景之族以作亂帥郊要餞之甲以逐劉子

壬戌劉子奔揚單子逆悼王于莊宮以歸王子還夜取  
王以如莊宮癸亥單子出王子還與名莊公謀曰不殺  
單旗不捷與之重盟必來背盟而克者多矣從之樊頃  
子曰非言也必不克遂奉王以追單子及領大盟而復  
殺摯荒以說劉子如劉單子亡乙丑奔于平時羣王子  
追之單子殺還姑癸弱駿延定稠子朝奔京丙寅伐之  
京人奔山劉子入于王城辛未鞏簡公敗績于京乙亥  
甘平公亦敗焉叔鞅至自京師言王室之亂也閔馬父

曰子朝必不克其所與者天所廢也 單子欲告急于

晉秋七月戊寅以王如平時遂如圃車次于皇 劉子

如劉單子使王子處守于王城盟百工于平宮辛卯鄆

肸伐皇大敗獲鄆肸壬辰焚諸王城之市八月辛酉司

徒醜以王師敗績于前城百工叛己巳伐單氏之宮敗

焉庚午反伐之辛未伐東園冬十月丁巳晉籍談荀躒

帥九州之戎及焦瑕溫原之師以納王于王城庚申單

子劉蚩以王師敗績于郊前城人敗陸渾于社 十一

月乙酉王子猛卒不成喪也

考異史記子朝攻殺猛

己丑敬王即位館于子旅氏十二月庚戌晉籍談荀躒  
賈辛司馬督帥師軍于陰于侯氏于谿泉次于社王師  
軍于汜于解次于任人閏月晉箕遺樂微右行詭濟師取  
前城軍其東南王師軍于京楚辛丑伐京毀其西南

二十三年春王正月壬寅朔二師圍郊癸卯郊鄩潰丁  
未晉師在平陰王師在澤邑王使告間庚戌還夏四

月乙酉單子取訾劉子取牆人直人六月壬午王子朝入于尹癸未尹圉誘劉佗殺之丙戌單子從阪道劉子從尹道伐尹單子先至而敗劉子還己丑召伯奭南宮極以成周人戍尹庚寅單子劉子樊齊以王如劉甲午王子朝入于王城次于左巷秋七月戊申鄆羅納諸莊宮尹辛敗劉師于唐丙辰又敗諸鄆甲子尹辛取西闈丙寅攻蒯蒯潰八月丁酉南宮極震葦弘謂劉文公曰君其勉之先君之力可濟也周之亡也其三川震今

西王之大臣亦震天棄之矣東王必大克 二十四年  
春王正月辛丑召簡公南宮嚳以甘桓公見王子朝劉  
子謂萇弘曰甘氏又往矣對曰何害同德度義大誓曰  
紂有億兆夷人亦有離德余有亂臣十人同心同德此  
周所以興也君其務德無患無人戊午王子朝入于鄔  
三月庚戌晉侯使士景伯蒞問周故士伯立于乾祭  
而問于介衆晉人乃辭王子朝不納其使 六月壬申  
王子朝之師攻瑕及杏皆潰鄭伯如晉子大叔相見范

獻子獻子曰若王室何對曰老夫其國家不能恤敢及  
王室抑人亦有言曰發不恤其緯而憂宗周之隕為將  
及焉今王室實蠢蠢焉吾小國懼矣然大國之憂也吾  
儕何知焉吾子其早圖之詩曰玼之罄矣惟壘之恥王  
室之不寧晉之恥也獻子懼而與宣子圖之乃徵會於  
諸侯期以明年 冬十月癸酉王子朝用成周之寶珪  
于河甲戌津人得諸河上陰不佞以溫人南侵拘得玉  
者取其玉將賣之則為石王定而獻之與之東訾 二

十五年夏會于黃父謀王室也趙簡子令諸侯之大夫  
輸王粟具戍人曰明年將納王宋樂大心曰我不輸  
粟我於周為客若之何使客晉士伯曰自踐土以來宋  
何役之不會而何盟之不同曰同恤王室子焉得辟之  
子奉君命以會大事而宋背盟無乃不可乎右師不敢  
對受牒而退士伯告簡子曰宋右師必亡奉君命以使  
而欲背盟以干盟主無不祥大焉壬申尹文公涉于  
鞏焚東訾弗克二十六年四月單子如晉告急五月



戊午劉人敗王城之師于尸氏戊辰王城人劉人戰于  
施谷劉師敗績 七月己巳劉子以王出庚午次于渠  
王城人焚劉丙子王宿于褚氏丁丑王次于萑谷庚辰  
王入于胥靡辛巳王次于滑晉知躒趙鞅帥師納王使  
女寬守闕塞 冬十月丙申王起師于滑辛丑在郊遂  
次于尸十一月辛酉晉師克鞏召伯盈逐王子朝王子  
朝及召氏之族毛伯得尹氏固南宮嚚奉周之典籍以  
奔楚陰忌奔莒以叛召伯逆王于尸及劉子單子盟遂

軍圍澤次于隄上癸酉王入于成周甲戌盟于襄宮晉  
師使成公般戍周而還 十二月癸未王入于莊宮王  
子朝使告諸侯曰昔武王克殷成王靖四方康王息民  
並建母弟以藩屏周亦曰吾無專享文武之功且為後  
人之迷敗傾覆而溺入于難則振救之至于夷王王愆  
于厥身諸侯莫不並走其望以祈王身至于厲王王心  
戾虐萬民弗忍居王于彘諸侯釋位以間王政宣王有  
志而後效官至于幽王天不弔周王昏不若用愆厥位

攜王奸命諸侯替之而建王嗣用遷邾鄆則是兄弟之  
能用力於王室也至于惠王天不靖周生頹禍心施于  
叔帶惠襄辟難越去王都則有晉鄭咸黜不端以綏定  
王家則是兄弟之能率先王之命也在定王六年秦人  
降妖曰周其有顓王亦克能修其職諸侯服享二世共  
職王室其有間王位諸侯不圖而受其亂災至于靈王  
生而有顓王甚神聖無惡于諸侯靈王景王克終其世  
今王室亂單旗劉狄剝亂天下壹行不若謂先王何常

之有唯余心所命其誰敢討之帥羣不弔之人以行亂  
于王室侵欲無厭規求無度貫瀆鬼神慢棄刑法倍奸  
齊盟傲很威儀矯誣先王晉為不道是攝是贊思肆其  
罔極茲不穀震盪播越竄在荆蠻未有攸底若我一二  
兄弟甥舅獎順天法無助狡猾以從先王之命毋連天  
罰赦圖不穀則所願也敢盡布其腹心及先王之經而  
諸侯實深圖之昔先王之命曰王后無適則擇立長年  
鈞以德德鈞以卜王不立愛公卿無私古之制也穆后

及太子壽早夭即世單劉贊私立少以問先王亦唯伯仲叔季圖之閔馬父聞子朝之辭曰文辭以行禮也子朝干景之命遠晉之大以專其志無禮甚矣文辭何為二十七年會于扈令戍周十二月晉籍秦致諸侯之戍于周魯人辭以難二十九年三月己卯京師殺召伯盈尹氏固及原伯魯之子尹固之復也有婦人遇之周郊尤之曰處則勸人為禍行則數日而反是夫也其過三歲乎夏五月庚寅王子趙車入于鄆以叛陰不

倭敗之 三十二年秋八月王使富辛與石張如晉請  
城成周天子曰天降禍于周俾我兄弟並有亂心以為  
伯父憂我一二親昵甥舅不皇啟處於今十年勤戍五  
年余一人無日忘之閔閔焉如農夫之望歲懼以待時  
伯父若肆大惠復二文之業弛周室之憂徼文武之福  
以固盟主宣昭令名則余一人有大願矣昔成王合諸  
侯城成周以為東都崇文德焉今我欲徼福假靈于成  
王修成周之城俾戍人無勤諸侯用寧螫賊遠屏晉之

力也其委諸伯父使伯父實重圖之俾我一人無徵怨於百姓而伯父有榮施先王庸之范獻子謂魏獻子曰與其戍周不如城之天子實云雖有後事晉勿與知可也從王命以紓諸侯晉國無憂是之不務而又焉從事魏獻子曰善使伯音對曰天子有命敢不奉承以奔告于諸侯遲速衰序於是焉在冬十一月晉魏舒韓不信如京師合諸侯之大夫于狄泉尋盟且令城成周魏子南面衛彪傒曰魏子必有大咎干位以令大事非其任

也詩曰敬天之怒不敢戲豫敬天之渝不敢馳驅况敢  
干位以作大事乎己丑士彌牟營成周計丈數揣高卑  
度厚薄仞溝洫物土方議遠邇量事期計徒庸慮材用  
書餼糧以令役於諸侯屬役賦丈書以授帥而效諸劉  
子韓簡子臨之以為成命 定公元年春王正月辛巳  
晉魏舒合諸侯之大夫于狄泉將以城成周魏子蒞政  
衛彪傒曰將建天子而易位以令非義也大事奸義必  
有大咎晉不失諸侯魏子其不免乎是行也魏獻子屬



役於韓簡子及原壽過而田於大陸焚焉還卒於甯范  
獻子去其柏椁以其未復命而田也孟懿子會城成周  
庚寅栽宋仲幾不受功曰滕薛邠吾役也薛宰曰宋為  
無道絕我小國於周以我適楚故我常從宋晉文公為  
踐土之盟曰凡我同盟各復舊職若從踐土若從宋亦  
唯命仲幾曰踐土固然薛宰曰薛之皇祖奚仲居薛以  
為夏車正奚仲遷于邳仲虺居薛以為湯左相若復舊  
職將承王官何故役諸侯仲幾曰三代各異物薛焉得

有舊為宋役亦其職也士彌牟曰晉之從政者新子姑  
受功歸吾視諸故府仲幾曰縱子忘之山川鬼神其忘  
諸乎士伯怒謂韓簡子曰薛徵於人宋徵於鬼宋罪大  
矣且已無辭而抑我以神誣我也啟寵納侮其此之謂  
矣必以仲幾為戮乃執仲幾以歸三月歸諸京師城三旬  
而畢乃歸諸侯之戍齊高張後不從諸侯晉女叔寬曰周  
萇弘齊高張皆將不免萇叔違天高子違人天之所壞  
不可支也衆之所為不可奸也

補逸國語敬王十年劉文公與萇弘欲城成周為之告

晉魏獻子為政說萇弘而與之將合諸侯衛彪傒適周聞之見單穆公曰萇劉其不没乎周詩有之曰天之所支不可壞也其所壞亦不可支也昔武王克殷而作此詩也以為飫歌名之曰支以遺後之人使永監焉夫禮之立成者為飫昭明大節而已少曲與焉是以為之日惕其欲教民戒也然則夫支之所道者必盡知天地之為也不然不足以遺後之人今萇劉

欲支天之所壞不亦難乎自幽王而天奪之明使迷  
亂棄德而即愒淫以亡其百姓其壞之也久矣而又  
將補之殆不可矣水火之所犯猶不可救而況天乎  
諺曰從善如登從惡如崩昔孔甲亂夏四世而殞元  
王勤商十有四世而興帝甲亂之七世而殞后稷勤  
周十有五世而興幽王亂之十有四世守府之謂多  
胡可興也夫周高山廣川大藪也故能生之良材而  
幽王蕩以為魁陵糞土溝瀆其有悛乎單子曰其咎

孰多曰萇叔必速及夫將以道補者也夫天道道可  
而省不萇叔反是以誑劉子必有三殃違天一也反  
道二也誑人三也周若無咎萇叔必為戮雖晉魏子  
亦將及焉若得天福其當身乎若劉氏則必子孫實  
有禍夫子而棄常法以從其私欲用巧變以崇天災  
勤百姓以為己名其殃大矣是歲也魏獻子合諸侯  
之大夫于翟泉遂田于大陸焚而死及范中行之難  
萇弘與之晉人以為討二十八年殺萇弘及定王劉

氏亡

五年春王人殺子朝于楚 六年周儋翩率王子朝之徒因鄭人將以作亂于周鄭於是乎伐馮滑胥靡負黍狐人闕外六月晉閻沒戍周且城胥靡 冬十二月天王處于姑猶辟儋翩之亂也 七年春二月周儋翩入于儀栗以叛 夏四月單武公劉桓公敗尹氏于窮谷 冬十一月戊午單子劉子逆王于慶氏晉籍秦送王已巳王入于王城館于公族黨氏而後朝于莊宮 八

年二月己丑單子伐穀城劉子伐儀栗辛卯單子伐簡城劉子伐孟以定王室哀公三年劉氏范氏世為婚姻莢弘事劉文公故周與范氏趙鞅以為討六月癸卯周人殺莢弘

辨誤

按韓非子說苑皆言叔向欲殺莢弘乃讒之于劉氏而誅之夫叔向晉之賢臣安有是事且此時叔向沒已久矣故當以傳文為據若莊子血化為碧之說庸或有之後人又附會侈述以為莢弘乃神仙則又

誣矣漢書兵陰陽家有萇弘十五篇

十九年冬叔青如京師敬王崩故也

以上子朝之亂

臣士奇曰幽王以寵伯服廢宜臼而轍遂東可為永鑒不謂後王甘蹈覆車如子克子頽子帶子朝之紛紛也子克之禍始于桓王之寵辛伯之諫可謂切直周公弗悟蓄剗刃之心幸而辛伯告密其事弗集周公之罪已不容誅子克餬口四方固其自取論者未嘗不嘆息有憾于桓王也莊王以孽



寵之故身幾被弑復有王姚之嬖愛子頹而以爲  
國傳之亦猶子克之屬周公也寵則必驕驕則必  
盈盈則其願將無所限極勢不陷於惡不止當時  
即無五大夫之怨而子頹之難亦將作矣五大夫  
含忿積怒而爲國以師傅之親事成則徼幸非福  
其倒行逆施宜矣蘇子寰內諸侯衛與燕皆王之  
懿親也亦黨蝥賊而犯大不韙于天下何義乎鄭  
虢同心翼戴卒綏王室豈止賢于燕衛萬萬但順

逆之分判若黑白鷹鷂之逐難緩須臾子頹敗亡  
亦豈須俟樂及徧舞而後知者若何于弭之命徘徊  
需次直聞子頹之樂禍而後決亦足見春秋諸  
侯之暗於大義耳衛為亂首伯廖命而齊奉討此  
九伐之遺也取賂而還君子惜之蘇子曾奉逆頹  
見滅于狄而王不救報施之理宜哉子帶之難始  
于惠后之寵惠王崩至秘不發喪而定襄王之位  
其勢亦逼矣此時即當割骨肉之恩而以義善處


之名戎犯闕逆帶之罪益彰越在岱陰根株幸絕  
齊保全其生親親之誼已厚迨齊人為之請復富  
辰亦從而慫恿於其中抑又何也卒有隗氏之通  
再挑狄禍襄王出走鄙在鄭地者踰年小不忍則  
亂大謀富辰安能辭其責哉至請滑不聽而以狄  
師伐鄭又以狄女為后謀之不臧階禍納侮若王  
之於子帶屬籍已絕而又歸之及其攻已而猶不  
忍禦篤於天性雖與仁人之不藏怒宿怨何異焉

惜乎所以處之者未盡其道而子帶狼子野心始  
終狂悖不可以人理責矣晉文辭秦師而專納王  
之美此伯業所由基請隧弗許王章未墜東周之  
所以綿延而不絕者賴有是乎子朝之難始于景  
王之寵而賓孟實成之犧雞斷尾逞其邪說向使  
景王不以心疾而殞單劉見殺子猛其不立矣及  
王崩而子朝作亂召伯夷南宮極尹氏毛伯之徒  
羣兇羽助獨一劉蚩單旗擁弱主崎嶇于奔北播

遷之中不幸王猛短世又改立敬王出萬死一生卒定其位豈不誠忠臣哉當時東諸侯無有能恤嫠婦之緯者獨一晉可控告而亦僅以籍談荀躒之偏師翱翔其間無救禍敗及乾祭涖問而後辭子朝之使子太叔正言而後謀王室之計乃決不知東王之為共主子朝之為嬖孽南宮極震寶珪浮河天人之意灼然可見而何嫌何疑之若此也使晉能早合諸侯輸王粟具戍人相與戮力以討

元兇豈至久辱草莽令子朝緩死荆蠻舉宗周之  
典籍而隨之以逸耶至敬王反正戍之固宜城之  
亦宜而宋為三恪乃不受功魏獻子且曰與其戍  
周不如城之天子實云雖有後事晉勿與知可也  
是何嘗有憂天災日之誠乎而衛彪傒乃妄引天  
之所壞不可支也之說深咎萇劉以城成周為大  
殃則益悖矣吁當世之人心如此而謂周能復興  
耶鄭黨子朝之餘孽稱兵犯順致敬王再有姑舊

之辱其罪與燕衛均也歷觀東周王室之亂凡四  
見無不始于庶孽成于嬖寵論者不省致亂之由  
而區區歸之穀洛之壅無射之鑄與夫不說學之  
敝是知其末而不知其本也



左傳紀事本末卷四